

# Carnavalskrant 2007

34<sup>ste</sup> Oetgaaf

"Gekke krant" veur 't BEMELER-LAND  
Bemele

't Gehuch



Gasthoes

't Wolfshoes    't Rooth  
Carnavalsvereniging  
"De BERGGEITTE"  
Bemelen



Preen's Huub I

Bèste Berggeitte, Bergbök en aander carnavaliste!!!

Och miene tied es 36<sup>e</sup> preens van de Berggeitte ziet er benao op.

Es ich nog un paar wêke mit de skepter maog swaje wil ich uns effe  
truk lore op unne geweldige tied deej iech samen mit m'n prinses  
Marian en de keender hôb maoge belieffe .

"ein maol preens te zien dat wilt toch ederein" en dat waar veur miech  
och zoe.

De wêke vuuraaf waore vuur os al 'nne gekke tied nao dat ze in keer mie  
broor Ger oetgeroop haowe es hunne preens en twie daag later pap es  
seniorpreens och nog doa beej koam toen stong iech natuurluk te  
springe veur oet te komme mer iech moes nog 5 weke wachte en dat is  
lang.

Eindeluk waar 't dan miene tied en moeg iech miech presenteren es d'r  
neuje preens van de Berggeitte wat al ederein dag en hoopte koam oet  
twie breurs en hunne Pap preense van Keer en Bemele zoe get makste  
neet dik mit.

Noa get medailles te hebbe vergete um te hangen en mein muts  
umgeruilt te hôbbe mit deej van de auwe preens Berry waar ut dan  
zoe weit dat de preense van Keer samen mit miech op 't podium in de  
geittestal stonge 'n geweldig moment ,ut leedsje "dat siet bie os in de  
familie "koam beej os good van pas.

Daags nao ut oetrope kaome de auw preense al aan, iech zag tege dei  
dat ze te vreug waore iech hau nog ein gans jaor te goen , ut jaor is  
zoe um sagte dei en dat klop och.

De groete vlag woerd recht gezat en s'maondes pakte de jeugd zieg  
enne adv dag van sjoel en waor us hoes umgebouwd tot unne echte  
preensemtempel, geweldig!

Dao nao veel ut bezoek na binne mit blomme,beer, eetpakkette en nog  
van aal mie en dat twie wêke lang de bis preens in bemele en dat zal-ste  
wete och.

S'maondes komme deej van de gazet , same mit Pap en Ger nao dat v'r d'r tuin hauwe plat getreid is 't deej meid toch geluk um 'nne foto te make en stonge vur 'n paar dag later in de gazet ,saove's brach 't zangkoer os nog 'n serenaat.

O jao mein preense muts bin ich nog gaon ruile mit auwe preens Berry deej van hum stong miech neet zoe goot.

Nao de foto's en deej andere verplietiginge te hebbe gedoen ginge vur friede's nao us ierste oetstapke in Ekkelder same mit de raod, dat waor unne gezellige aovend mit al deej neu preense in de zaol, wat dao nao alle maol gebeurde ging zoe snel, vur dat ich 't wies zaot ich mit deej van Scheulder in Sintgieter,Ekkelder,Mergraote en Scheulder inne van de raod van os houw get van hun en deej houwe de preens van bemele, vreug in de murge hebbe de twie raode weer alles geruilt.

Zaoterdes ginge veer nao te bannet mit get vertraging kaome v'r dao aan, deej van scheulder dachte dat iech neet mie oet moch, same mit twie bodygards wat deej houwe ingeheurt en die miech de ganse aovend in de gate höbbe gehawwe,höbbe veer dat alle maol oetgekald en noch uns good drum gelâche.

Zoondes-miedes waore veer beej de Berggeitsjes op hunne zieting en 't oetrope van het neuje preense paar ondanks dat veer enne voetbalwedstrijd houwe ,me deej heid Leon mit veel tamtam wete af te lasse, dach ich dat mit Ger en Pap get unieks houwe mer in Bemele kaum 't ierste prinsessen paar oet Roos en Rowie same mit drie echte prinsessen koes de carnaval vuur miech neet mie kapot.

Goonsdes ginge veer mit un paar man nao de seniorenzitting in mergraote, deej senioren van bemele makte 'nne hoop kabaal wie iech neet beej hun moch goan ziette mé op 't podium samen mit alle preense van mergraote en natuurlijk neve Ger en Pap.

Dinsdag woar ut moment dat v'r mit de groete optoch van oet 't gaste's noa bemele kaome van boven op de preensemewage is dat é prachtig

oetzieg 's te bemele in keumps al deej lui wat doa stonge te springe en nao os te weenke en te swejje .

"veer hubbe de preens in de sjtroat" dat hôbbe zu loate weite.

Wat é prachtig moment weej veer os sjtraot in ginge, euveraal vlagge,ballonne slingers en preensefotos aan de lantierepaole en achter de roete , schitterend.

Esgoondig zien v'r os askruiske gaon hoele in unne volle kerk heb iech de sleutel truk gegeven aan pastoor dei iech zaoterdes heb gekrege. Dao nao beej pol nog wat heringe gegeten en wat nao gekalt euver de carnaval

Eederein hartstieke bedaank vuur deej schiterende momente van sjoelcarnaval samen mit de prinssen in de koetsj, zieken en bejaarde bezeuk ,springavonde beej 't plateau,baskuul en zaal, de geit op en aaflaote , 't preense paar van de straat Jean en Jeanette , de jeugd vuur 't hoes te verseren,de straat, het prinsessenpaar Roos en Rowie,de zoepnase,oos femilie, de dames van de Raod en natuurlijk de raod van 11 en presedent d'r Pierre

Iech zaow waol get vergete hôbbe me hôb d'r in de gate das-ste es preens van Bemele van aal mitmaks

Dea nao miech zal komme weens iech dan och veul plezeer en spajs en 'nne plezerige carnaval 2007

Eederein hartstieke bedank och van Marian ,Remco en Niels

Berggeitte allaaf

Preeens Hub 1e

# **OPROOP van de STRAOTNAMEKEMISSION**

De Straotnamekemissie van de gemeente Mergraote begint binnekort mèt de procedure veur 't keeze van de straotname veur 't nuij oetbreidingsplan in Bemele. Umtot veer 'n demokratiese kemissie zeen, wille veer dao de inwoenersj van Bemele euver laote mètpraote. Op vriedig 13 augustus hauwte veer 'n openbaar huurzitting (mèt gratis beer!) in kaffee De Baskuul, mèr veur dè'n tied wille veer gère al uuch ideeje huure. Geer kint die tot veertien daag veur de huurzitting bee os indeene, leefs sjriftelik. Veer wieze uuch d'rop dat veursjtèlle veur straotname moote voldoen aan 't gemeintelik sjtraotnamereglement. Name die dao neet aan voldoen, weure neet in behandeling genoome.

## **VERBOOJE ZEEN:**

- Straotname die neet passe bee de umvang en 't karakter van 't dörrep, zoe wie: straotname die eindige op -boulevaar (Maasboulevaar in Mestreech, dat kin, Kattegrubboulevaar in Bemele, dat kin neet), op -allee (dus neet: Vrij en Blij-allee-hop) of op -laan (dus neet: Daokeumperalaan).
- Straotname die dùbbelzinnig kinne euverkome veur gaste van boete 't dörrep(dus neet: Hollandersweg, Maakdichweg, Bliefdaoweg, mèr auch Meidenweg).
- Straotname die verwarring kinne zèjjie bee de bezùrregers van de gezèt of bee de postbooje (dus neet: Umweeg, Zijweeg, Oonderweeg, Euverweeg).
- Straotname woe-in sjluikreclame weurt gemaak veur plaatselijke bedrieve (dus neet: Baskuulweeg, Versvoordeelvaessenstraot).
- Straotname die neet op 'n envelop passe en auch neet op 'n Scrabble-bord (dus neet: Ouwtbörregemeisterwiehètheerauchweerweeg, Derveelstoevalligniksbetersinstraot).
- Straotname die opgevat zòwwe kinne weure es beledigend (dus neet Sjaelenhoondweeg, Sjtaalkabelesjtraot, Zaatendweilweeg).


- Straotname die aafgeleid zeen van name van levende persoene (dus neet Gebroeders Pittiepaad)
- Straotname die de towkomstige bewoners éine sjechte naam bezùrrige (dus neet: Goudkùs, Hypotheekweeg, Erremoodzèjjersplein, Twiede Sjlappебäörzedwarsstraot).

Veur de rès is zoe ongevèèr alles meugelik. Dus laot van uuch huure!!

Names de Straotnamemissie, J.J.J. Weggemans (sikkertaris)



Sjponsor



**AUTOSERVICE KEER**

- ◆ verkoop nieuwe en gebruikte auto's
- ◆ reparatie en onderhoud alle merken
- ◆ APK-keuringen benzine en diesel

Kerkstraat 38a 6267 ED Cadier en Keer  
 tel 043-4072727 fax. 043-4072733 [www.autoservicekeer.nl](http://www.autoservicekeer.nl)

**Patrick en Paul**

## DANKBETUIGING

Sjeetvereinigung Bergziech bedank van ganser harte de redaksie van de Gekkekrant van de Berggeitte veur 't plaatse van de oproop veur nuij leeje in de oetgaaf van 't aafgeloupe jaor. De belangsjtèlling waor zoe euverweldigend dat veer os doel bienao veurbeej snoote. De nuij lede hùbbe ziech good aangepas. Ze zeen intössje ingesjoote, en soms auch al fleenk aangesjote. Veer zòwwe eederein wille oproope: adverteer veurtaan in de Gekkekrant!! Dao sjùtste tenminste get mèt op!

## VERMIS

Glaas beer, veur 't lèts gezeen in 't gemeinsjapshoes van Bemele, veurig jaor op vastelaovesdeendsdig. Sinjalemint: Hauf lègggedroonke, geine snoemkraag, neet in gespeijd, dus nog zo good wie nuij. Dagelijkse naosjpeuringe in alle kaffees van Bemele en umsjtreke hùbbe gein sjpoor van 't vermistie glaas beer opgeliieverd, en iech hùb toch hiel gèt glaazer tot op de boojem onderzeuk. Wè haet mien beer gezeen? Breeve onder nummer 11-4-11 van dees gezèt.

## PERSONEEL GEZEUK

CV de Berggeitte zeuk bekwaam en good opgeleid beveiligingspersoneel, um de prins te bewaake es zee toevallig ins eve neet op 'm lètte. Veer eise: aafsjrikwèkkend oeterlik, breij sjouwwers, aafgetraind lichaam (genòg kondisie ùm ein Berggeit bee te hawwe, dus dat vèlt waal mèt), good besjstand tege oploupende sjpanning (in de blaos en in 't algemein). Ervaring mèt ontveuringe is mètgenoome, zjus wie vloeiende beheersing van 't Sjuulders dialèk. Veer beeje: gratis doonkere bril en oerdùpkes, gratis beer (zoelang de veurraod sjtrèk). Sollisitasies (mèt pasfoto) opsjtuure nao nummer 11-5-11 van dees gezèt, of rechstreeks nao de president van CV de Berggeitte.

**NIEUWS-FOTO-QUIZ**

# Doech met, en weur lezer van 't carnavalsseizoen 2007 !

In naovolging van dagblad de leugeneer organisere veer van de carnavalsvereiniging same met d'r Tump ouch un "lezer van 't jaor" verkiezing of, in os geval, unme "lezer van 't carnavalsseizoen" Eederein kin met doen, 't is neet meuijlik, geer hoof bee de foto's allein mer 't gooje oondersrif te keeze. Veul succes !!

**Foto 1**

- A. Pierre Pirnay versjlik zich in kneukske in Sjuif mer aan menu cafe de Baskuul
- B. PP weurt beloend nao dreij daagse gehoorzaamheidscursus.
- C. PP liet zeen dat zien tan dit jaor waal good vastzitte

**Foto 2**

- A. Hangjongere blieve noe ouch sjlaope en make d'r 'n ligkplek van.
- B. Joonkheid kump onder de kar nao aovendsje Pol.
- C. Jongeren hobbe gelierz van veurig jaor en bouwe carnavalswage noe boete (hove ze de waage net mie half aaf te breeke)





**Foto 3 (ouw foto)**

- A. Carnavalsvereinigung Bemelen betaald 9 tuiten beer veur ontvoerde Burgemeester door raod (van elf) Keer.
- B. Umdat d'r toen nog gein riolering waor woorte de zeikvaate opgehaold.
- C. Raod Bemele kik wat ze in ei jaor bee elkaar gezeiverd hobbe

**Foto 4**

- A. Veurzitter FC Bemelen contracteerd neuije sjpits veur 't ierste. N'kome Gole
- B. Foto Preensepaar Bemelen mer half ontwikkeld.
- C. Preens Huub l'sjpek de kas door reclamefilmpke "duo penotti"



**Foto 5**

- A. Vleegveld Beek onderzeuk geluidseuverlast Bemelse optoch
- B. TNO onderzeuk versjil optoch met en zoonder Serve
- C. Gaston Ubachs is aan 't kieke boe heer zien neus noe weer tusse wil sjteke

**Foto 6**

- A. Wandeleirs Banneuxtocht sjtappe achter Keer sjtiekem in de kar.
- B. Vogelwerkgroep Bemele vindt verzameling zjwervers tijdens jaorlikse opruimactie
- C. Carnavalsvereniging Bemele bezuinigd op nuije prensewagen

**Foto 7**

- A. Herdershond en plisiehond in Bemelese optocht.
- B. Deke Haffmans onder plisie-begeleiding geinstalleerd es nuije pestoer Bemele
- C. Pesjtoer mot bloze in optoch

**Foto 8**

- A. Preenes Huub trek lijne daags nao piratepartie bee Pol
- B. Veurzitter FC nog neet geweend aan nuij veld
- C. Veurzitter legk tactiek vast op veld (weeg nao de goal...)



**Foto 9**

- A. Bus nonnen wacht op rondleiding Mariagrot door de kromme
- B. Opname " Happy Feet" bee boerdeij Frijns
- C. Collectebussen sjtoon klaor veur groete missieactie

**Foto 10**

- A. Bemeleir heit lak aan roukverbod in de cafe en sjtik demonstratief twie sigare tegeliekertied op
- B. Gaston wil sjtoppe met rouke en sjtik zich per ongeluk unne TWIX op.
- C. Jao dat kreigste es te twie sigare kreigs veur éine bon, jaomer dat ste gein twie glaaze beer kreigs veur eine bon...



**Foto 11**



- A. Nao latino-aovend noe ouch moslimaoavend bee cafe Baskuul (hoofddeukske verpliech)
- B. Hoesbezeuk thoeskapper gein succes
- C. Nao optreije de drie tenore alternatief trio opgeriech: de drei auw hoore...

**Foto 12**

- A. Huub I verkleid es preens nao Andre Hazes herdeenking.
- B. Prinses Marian huurt bodyguards in tegen opdringerige vrouwluij.
- C. Preens geit verkierde café binnen in Mestreech en mot veurop in polonaise..



**Foto 13**



- A. Wegens hoege ziektekosten maak raod van ellef zellef tandprothese van kauwgum veur veurzitter.
- B. Veurzitter weurt 'ns (te) sjtevig aan de tand geveuld door FIOD.
- C. Veurzitter it oet de hand van de preens (veural pindaneutsjes)

...en zeet g'r d'r un bietsje oetgekome, of mot geer d'r nog ns good euver naodeenke?

Wèt geer 't zeker, sjtuur dan unne mail nao 't mailadres van de redaktie met daarin uch gooij antwoorden..

Mailadres redactie [Buf@bemelen.com](mailto:Buf@bemelen.com)

De prieswinnaar maog ziech un sjoen foto oetzeuke en hoof volgend jaor zelf neet met un foto in 't gezetsje...

*GOOD NUIJTS VEUR WIEN-  
LEEFHÖBBERS !!*



Geer höb d'r lang op moote wachte, bëste wien-vrùn, mèr eindelijk is 't dan zowied: komend najaor weurt de ierste peersjing verwàch van de nuijje wiengaard op de Bemelerbèrreg. Veer höbbe van d'n eigenaer al vás ins veur maoge preuve van de ierste prebeersels, gemaak van 'n paar wiensjtèkke die heer es proof aafgeloupe jaor in zienen achtertuin haw geplant, en veer kinne uuch zègke: geer wèt neet wat geer sjtraks oonder uuch naas krijg!!!

Wàt 'n bouquet (eine oondertoen van bitter broongreun eike, mèt 'n vläogske rommedoe en 'n zjweem van proemevlaai), wàt 'n kleur (floonkerend roedbroen mèt 'n bitsje greun um de naas), wàt eine aafdroonk (de preufs 'm drei daag denao nog altied, behauve este veur dè'n tied al moos kotse). Dizze wien sjprink bienao oet 't glaas en pak diech bee de sjtroot. Sjmaak oetsjtekend bee roggebroed mèt huidvleisj en mosterd, mèr auch bee hieringe. 'n Belevenis um noets mie te vergete. De bekinde Franse wien-professor dr. Jean-Kloot Boozjelai kós nao 't dreenke van 't iersjte glaas twie weke gein

woord oetbringe, mèr wie heer van de dokter weer 't ziekehoes oet moch, zag heer: "Zoegèt hùb iech nog noets van mien leve door miens sjtroot veule goon!" Metein daonao is heer jènkend nao Frankriek vertrokke, en dao haet heer ziech trùgkgetrokke in ein kloester woe heer noe op water en broed laef.

En vanaaf komend najaor maog geer dao allemaol van mèt – geneete!!!

Veer hùbbe inmiddels begrepe dat d'n eigenaer van 't wiengood groete planne haet um zien produk metein good op de mèrret te bringe. D'r goon geruchte – heer wil dat zèllef neet bevestige, mèr ontkint 't auch neet – dat heer 't gemeinsjapshoes al haet aafgeheurd um d'r metein nao de produksie van de iersjte flesje 'n groet Wienfees tegenaan te goeie, compleet mèt de verkeezing van de iersjte Bemeler Wienkeunigin.

De iersjte export-kontrakte zeen inmiddels geteikend. Vanoet Bemele goon vanaaf vollegend jaor jaorliks drei doeze nao ein groete supermèrret-kete in Noord-Korea, òondanks proteste van de Amerikaanse president George W. Bush dae bang is dat ze 't dao goon gebruuke es groondsjtof veur chemiese wapes. En auch in Lapland is belangsjìëlling, veural umdat de Bemeler wien zèllefs bee 30 grade onder nul nog neet bevruis, en dus oetsjekend gebruik zow kinne weure es anti-vries veur rendeere.

Zoonder euverdrieve dörreve veer noe al te zègke: oet Bemele keump de wien, woe eederein kepot van zal zien!!

Uuge wiensjpeesjalis  
C. Migraine



# OFFISJEEL MÈTDEILING

De regeerende prins van Bemele, op groond van de bevoegdhede die van de sjtart van de vastelaovend tot en mèt asgoonsdig aan häöm zeen euvergedrage door 't kleesj van börregemeester en wèthauwwersj van Mergraote, geleze artikel 472-bis van de *Wèt op 't Oonverantwoord Drankgebruuk*, artikel 112 en 113 van 't *Reglement veur de Erkenning van Onoetsjpreekbare Diejalekte* (Europees Verdraag, hofsjtuk 3, paragraaf 11), artikel 8 van de *Limburgeringswèt* (paragraaf 3a van de toelichting) en de *Sjtatute van CV de Berggeitte* (nog in de maak) verordonneer 't volgende:

1. Dat 't mèt ingang van 2007 verbooje is ziech tijdens de carnavalsdaag in Bemele op te hawte zoonder geldig identiteitsbewies, veurzeen van 'n good geliekende pasfoto woe-op gelache weurt. Nederlandse identiteisbewieze mèt sjagrijnige köp zeen die daag neet geldig.
2. Dat mèt ingang van 2007 veur 't viere van vastelaovend in Bemele 'n bewies van Limburgering verpliech is. Neet-Limburgers moote op z'n mins ein bewies höbbe dat ze de Limburgeringscursus veur beginners mèt good gevolg aafgelag höbbe. Veur neet-Bemelenare die waal Limburger zeen, is 't diploma van de applikatiecursus veur gevorderde verpliech.
3. Dat euvertrèijinge van de veursjrifte 1 en 2 sjtreng besjtraof weure. Veer weite nog neet mèt wat, mèr veer bedeenke waal gèt.

## Aanvullende bepalinge:

Limburgeringscursusse kinne allein gevölleg weure bee 'n erkènd opleidingsinstituut, dat voldeit aan de eise die zeen vásgeleg in artikel 2-11 van de Limburgeringswèt. In Bemele is dat de aafdeiling algemein vastelaoveszake van CV de Berggeitte, onder leiding van prof. dr. P. Pittie. Op 't cursusprogramma sjtoon lesse in dialèk (Biémelese sjaele kàl) in beerdreenke zoonder sjpeije (veur beginners) of marathonbeerdreenke (veur gevorderde), in algemeine kennis van Bemele (spesjaal kaartleze, zoedat geer in alle umsjtandighede de weeg van thoes nao de kaffee en de zaal kint veende en weer trùgk), en in 't danse van de polonaise.

Aanmeldingsformuliere kinne tot carnavalszaoterdig weure ingeleverd bee de Raod van Ellef.

## AANMELDINGSFORMULIER

Iech, ..... (naam invulle, sjuinnaam maog auch) meld miech mèt dit formulier aan veur de Limburgeringscursus veur beginners/gevorderden (doorsjtriepe wat neet van towpassing is).

Iech bin (gooj bôlke zjwart make!!):	<input type="radio"/> O neet van Bemele mèr waal Limburger <input type="radio"/> O neet van Bemele en geine Limburger <input type="radio"/> O waal van Bemele mèr geine Limburger <input type="radio"/> O Belsj <input type="radio"/> O van de mèllekboer
Iech sjpreek van hoes oet:	<input type="radio"/> O Huilands <input type="radio"/> O Mestreechs <input type="radio"/> O neet mèt vrèm luuj <input type="radio"/> O mèt comsumptie
Iech dreenk	<input type="radio"/> O Neet (mie) <input type="radio"/> O auch neet minder <input type="radio"/> O gère ein glaas beer, of twie <input type="radio"/> O neet, iech zoep
Mien groetste angs mèt carnaval is	<input type="radio"/> O dat ze zoonder miech beginne <input type="radio"/> O dat ze miech per oongeluk prins make <input type="radio"/> O dat 't al weer um is veur iech 't in de gate höb

Handteikening (kruiske maog auch) .....

Gironummer .....

Waarsjouwe in geval van toeterzaatigheid .....

Nuij Dirigente St. Laurentius  
hèt goed de weend d'r oonder en liet  
hermenie blooze en blozen...



# Carnavalsprogramma 2007

Oetnumbaar

- Zaoterdag 3 februari :  
**Ouw Wieveral met Prinsoetrophe**

'T Bal begint um 20.11 oor en de nuije Preens (de 37<sup>e</sup>) zal um 22.11 oor weure oetgeroope.

Muziek: Hans Coenjarts

- Zoondig 4 februari  
**Foto's ophange**

Vanaaf 17.00 oor bee  
Café 't Plateau en Café de Baskuul

- Zoondig 11 februari  
**Keender-Zitting**

Um 13.11 oor: Oploate van de Berggeit en ballonnen -wedstrijd Aansjletend optredens vaan diverse artiesten van eigen bodem.  
Um 16.00 oor: Oetroope vaan de nuije Jeugdpreens en Prinses's aoves : foto's ophange in Café de Baskuul



## • Zaoterdig 17 Februari **Sjleuteleuverdrach en ophange Geit**

Iers: Sleutel-Euverdrach In 't  
Gemeintehoes in Mergraote (allein  
op oetnuudiging)

En daonao:  
Um 19.30 oor:

Open van de carnaval in Bemele  
door 't optrekke vaan de Geit  
bie de Den.

's Aoves gunt de Groete en  
Kleine Prins mit hun gevolge nao  
café "t Plateau" boe veur eederein  
get te ete en te drinke is



- *Zoondig 18 Februari*

## **Groet carnavalsbal**

Groet Carnavalsbal in Café  
‘t Plateau. Vanaaf un oor  
of 20.00 tot un oor of zoe



- *Maondig 19 Februari*

## **Oetruste of nao Keer?**

Jeugdpreeensepaar mit ziene raod van ellef  
bezeuke de keendercarnaval in Keer in ‘t Keerhoes.  
Rustdaag Groete raod van ellef...  
(mèr ze zeen toch ouch in keer....)

- *Deensdig 20 februari*

## **Groete Carnavalsoptoch**

Opsjtelle	: 12.11 oor op ‘t Gasthoes
Vertrek	: 13.11 oor

‘s middags en ‘s aoves springe in de zaal

Aafloate Berggeit roond 22.00 oor.



- Asgoonsdig 21 Februari

## Hieringe-biete

De Prins en ziene raod  
nuudige uuch oet um same  
met hun um 19.00 oor de mis  
te bezeuke.

Daonao:Hieringe Biete bee Cafe de  
Baskuul


## Carnavalskalender:

En veur diegene die 't neet lang genog gedoord hèt en neet  
kinne wachte op de volgende carnaval de planning veur de  
ierste 10 jaor:

- 2008 - 3-4-5 februari, (jao, 't kin nog vreuger)
- 2009 - 22-23-24 februari,
- 2010 - 14-15-16 februari,
- 2011 - 6-7-8 maart, (laat, 't is bijnao zomercarnaval)
- 2012 - 19-20-21 februari,
- 2013 - 10-11-12 februari,
- 2014 - 2-3-4 maart, Jubileumjaor (4x11 es 't good is..)
- 2015 - 15-16-17 februari,
- 2016 - 7-8-9 februari,
- 2017 - 26-27-28 februari, Jubileum Gezetsje (4x11)

Hoezo,  
ik ben te oud???

Sinterklaosfees in Bemele  
sjpecial veur keender...



Inbraak in kantine  
F.C. Bemelen:  
Veurzitter:  
"Gelukkig höbbe ze  
de prijzekas met rus  
gelaote....."

## DE OMBUDSMAN

In naovolging van de groete gezèt hèèt auch de Gekkekrant van de Bemeler Berggeitte mèt ingang van dit seizoen eine ombudsman in deens, dè uuch antwoord geuf op al uuch brandende vraoge euver carnaval in 't algemein en carnaval in Bemele in 't biezeunder. Geer kint háóm al uuch probleme mèt 'n gerùs geweite veurlègke. Alle breeve (geer kint ze insjture nao de redaksie van de Gekkekrant) weure in vertrouwwe behandeld, en ver vertèlle ech niks weiijer. Vandaag 'n iersjte seleksie oet de breeve die veer tot noe tow binne höbbe gekrege.

*Geachte ombudsman,*

*Veurig jaor hób iech eine flater gemaak. Iech haw gèt väöl beer op, en wie iech 's nachs thoes kaom, hób iech op de sjlpinternuuj witte vloerbedèkking gekots. Die vlekke ginge neet mie d'roet. Noe höbbe veer nuij vloerbedèkking, sjieke greune. Mien vròw haet al mèt 'n sjeiung gedreig es iech die auch weer verenneweer. Wat moet iech doen?*

*S.V. te B.*

*Bèste S.*

*De kins netuurlik prebere um mèt de komende vastelaovend ins gèt minder te dreenke, mèr dat is mesjiens gèt väöl gevraog. Daorum eine tip woe iech zèllef altied väöl plezeer van höb gehad: gaank op dieet. Kiek good wat veur 'n kleur vloerbedèkking datste in de kraom höbs, en pas dao dien menu op aan. Bee diech is de vloerbedèkking greun, dus zow iech veurdat iech op sjtap ging veural sjpinazie ete, of greunmoos. Este danb thoes keumps en de moos kotse, dan kleurt dat in eeder geval good bee de vloerbedèkking. Mèt 'n bitsje gelök mèrrek uuch vrouw dao niks van. Tip veur alle andere*

# DE OMBUDSMAN



ombudsman@Bemelen.com



t.a.v. Ombudsman

Postbus 11

2007 CV Bemelen



Maandag en donderdag  
van 10.00 tot 12.00 uur

*carnavalsvierders: sjaf noets blauw vloerbedekking aan, want dao zuuste alles op.*

**Geachte ombudsman,**

*Iech höb probleme mèt miene maag, en d'n dokter wèt neet woe 't van keump. Noe haet heer gezag dat iech bee wijze van experiment ins de hellef minder moot dreenke, um te kieke of 't dan beter weurt. Dan wèt heer tot 't van d'n drank keump, zèt heer. Es iech doorsj höb, moot iech miech mèr 'n appeleseen pakke. Zeet geer 't al veur uuch, zoe vlak veur de carnaval? Zeen dao gein andere methodes veur?*

**G.M. te B.**

**Bèste G.**

*Iech kin miech uuch probleem levetig veursjtèlle. Iech bin netuurlijk geinen dokter, mèr woerum zowt geer 't neet net andersjum doen? Gewoen de hellef mie dreenke, en dan kieke of 't sjlechter geit. Dan weurt auch waal duudelik of 't dao aan ligk. En dat van die appeleseene, vergeet dat mèr. Geer wèt zèllef waal wievääöl doorsj de gemiddelde carnavalsvierder hèèt op einen aovend in de Groete Geittesjtal in Bemele. Zoevääöl appeleseene op einen aovend, die krijg geine minsj op.*

**Geachte ombudsman,**

*Iech wil hiel gère carnaval viere, mèr iech weit neet wat iech aan moot trèkke. Kint geer miech mesjiens gèt advieze geve. Iech bin, al zègk iech 't zèllef, ein nogal good gebouwd vrouwesj, dus miech sjteit eigelik alles.*

**A.v.G. te B.**

**BèsteA.**

*Mien bëste advies veur de vastelaovend: trèk diech nùrreges gèt van aan... Dan trèkste in eeder geval volop de aandach. Zeker este d'r van d'n eige aantrèkkelijk oetzuus, kinste op die menier aardig aan d'n trèkke kome. En wat dat veur sjùt loupe aangeit: este in dien situwasie bee 't oettrèkke toevallig eine sjùt tege keuns, kinste beter achter dae goon loupe. Andersj sjteit dae auch alles.*

**Geachte ombudsman,**

*Ze höbbe miech gevraog um lid te weure van de Raod van Ellef. Noe zouw iech dat waal wille, mèr iech weit neet good of iech waal bee zoe'n*

*gezèlsjap pas. Zouwt geer miech kinne vertèlle welke eigensjappe ein lid van de Raod van Ellef moet höbbe?*

*R.T. te B.*

*PS: moet iech iersj aan mien vrouw vraoge of die 't waal good vint?*

*Bèste R.*

*Tja, wat zal iech dao ins van zègke? Aan lede van de Raod van Ellef weure gein al te hoeg eise gesjtèld. Ze moote tot twellef kinne tèlle (um 'n rundsje veur de raod en de prins te kinne besjèlle) en ze moote 'n zjwart pak hùbbe. Dat is 't waal zoe ongevèèr. Veur de rès: die patsj pas eederein (soms mèt 'n bitsje meujte...). De kondisie sjpèèlt gein rol. De moos allein eine gooje sjprint in de bein hùbbe um diech sjnel oet de veuj te kinne make es de polonaise in de buurt dreig te kome. Netuurlijk moet geer niet vies zeen van 'n glaas beer, mèr dat zal waal in orde zeen, want andersj hawwe ze uuch neet ins gevraog. Iech zow zègke: begin ins mèt eine prooftied, dan kint geer altied nog zeen of 't uuch bevèlt.*

*En wat uuch vrouw aangeit: zègk mèr dat ze 't zoonder uuch neet kinne, en dat iech 't good veend. Es ze dan nog get te brazele haet, sjtuurt geer ze mèr ins langs. Geer zeet toch getrouwdd mèt die knappe bloonte, hè?*

#### *Sjponsor*

Voor aankoop, vakkundige reparatie en onderhoud van al uw land- en tuinbouwmachines

## **LAND- EN TUINBOUW-MACHINEHANDEL BÈR HUYNEN**

Aan de Fremme 58  
6269 BE Margraten  
Tel. 043-458 43 80  
Fax 043-458 43 81  
E-mail: ber@huynen.etrade.nl



**Leverinsprogramma o.a.**

**VALMET-ZETOR-EICHER-HARDY-PÖTTINGER-JOSKIN  
RABE-MULLOS-HOLORAS-STRAUTMAN-SABO-ALKO  
HUSQVARNA**



Nuij raod van ellef kostuum zit es gegote

# WIS GEER??? WIS GEER ???

- 
- ? Dat veer besjloote hùbbe um dit jaor Servé, ein van de vaste hofleveranciers veur deze rubriek, mèr ins mèt rùs te laote....?
  - ? Dat veer veende dat heer 't al meujlik genoeg haet noe 't neet zoe good geit met zienen awwe koempel Fildel C....?
  - ? Dat veer daorum 't beriech in de gezèt euver dè vent dè door de pliesie in Bemele woord opgepak mèt eine wagel vol geklauwde kabele veur deze kier mèr laote veur wat 't is....?
  - ? Dat veer trouwwes oet betrouwbare bron gehuurd hòbbe dat 't neet um sjtaalkabele ging mèr um koper...?
  - ? Dat d'r dus auch eigelik jielemaol gein reijje is um dao flauwe gräpkes euver te goon make...?
  - ? Dat veer dus mèr gauw euversjtappe nao ein ander oonderwèrrep: de inbraak in de kantine op 't sjportveld...?
  - ? Dat veer nog altied neet good begrieppe wè ziech zoegèt liet invalle, umdat bee de FC Bemele al jaore nik s mie te hoole vèlt...?
  - ? Dat veer daobee 'n oetzeundering moote make veur bezeukende elftalle, die van 't sjportcomplex in Bemele tenminste miestal nog drei punte mèt nao hoes neume...?
  - ? Dat ze bee de FC Bemele oet erremeuj oeteindelik d'n trainer mèr nao hoes hùbbe gesjtuurd...?
  - ? Dat ze daonao inins gine winne, en bienao nog per oongeluk periodekampioen woorte auch...?
  - ? Datste diech toch aafvreugs of ze toen eindelijk ins ginge doen wat dè'n trainer hun al zoe lang haw prebere te liere: voetballe...?
  - ? Dat de opening van 't sjportseizoen dit jaor eindelijk ins eine kier op tied waor? En dat ze toen neet op 't veld mochte umdat 't graas neet wilde greuje...?

- ?
- Dat ze volges os beter 'n keunsgraasveld koste aanlègke, mèr dan waal eint van pepier, umdat Bemele op pepier bès 'n aardig elleftal haet...?
- ?
- Dat ze um de koste te drükke dat veld waal mèt de hèllef in kinne korte, umdat in Bemele miestal tóch mèr op ein hèllef gevoetbald weurt...?
- ?
- Dat ze de koogrùb geasfalteerd hùbbe, en dat die sinds dè'n tied plotseling deftig Koeestraat hèt...?
- ?
- Dat veer os bee "n sjtraot toch gèt anders veursjtèlle es 'n grùb woe ze 'n laog asfalt euverheen hùbbe gekiep...?
- ?
- Dat Bemele dit jaor mèt 'n prachtig groet verhaol in 't Algemeen Dagblad sjtong, wat veur de toeristesector in 't dörrep toch goed nujts moot zeen gewaes...?
- ?
- Dat Pölke van de Baskuul dao zoe z"n vraogteikes bee zat, umdat onder 't hoofsjtuk 'waar te verpozen?' waal café de Baskuul waor vermeld, mèr dan mét 't adres en 't tillefoonnummer van café de Baskuul in Velden...?
- ?
- Dat Velden in de buurt van Bemele in gein velden of wegen te bekinne is, umdat 't in de buurt van Venlo ligk...?
- ?
- Dat 't van Velden nao Bemele nog 'n hiel sjtuk wandele is, zèllef s' veur luij die 't Pieterpad gewind zeen....?
- ?
- Dat die luij dan in eeder geval waal goojen doorsj hùbbe es ze eindelik bee Pölke op de sjtoep sjtoon...?
- ?
- Datste in Bemele, noe op goonsdig neet allein de kaffee gesjlote is mèr auch in de kèrrek gein mis mie weurt gedoon, langzamerhand neet mie wèts watste mèt diene goonsdigaovend aan moos vange...?
- ?
- Dat geer tenminste eine kier per jaor 't gelök hùb dat geer uuch op goonsdigaovend bezig kint hauwte mèt de sjaele wazel van dees carnavalsgezèt....?
- ?
- En dat 't neet verbooje is dees gezèt op ander daag te leze, es uuch dat beter oetkeump...?
- ?
- Dat veer d'r veur dit jaor mèt oetsjeijje, mèr volgend jaor gegarandeerd weer trùgk zeen mèt nog väöl mie oonzin....?

**? Wis geer dat allemaol? Dan wis geer net zoe  
väöl es veer...**

**Zeuk de 10 Versjille,  
('t maoge d'r ouch get miejer zeen...)**



# De Geruchtemeule

Dao zeen veer dan weer, met 'n nuij aaflievering van de Geruchtemeule, de rubriek dè 't beste geleze weurt van alle rubrieke in dees gezèt, de rubriek woe-euver de ganse vastelaovend weurt naogepraot. Roddels en andere verhaole oet 't Bemelese leve van alledaag....

Mesjiens höb geer 't gemis, mèr Bemele begint 'n internationale reputasie te kriege in de waereld van de luuj die gère ins in hoegere sfere zitte... En woe vinste in Bemele hoegere sfere? Zjustemint: bove op de berreg, op 't Gastes. Iersj dachte de luuj in Bemele nog dat 't toch waal hiel biezeunder waor dat zoeväöl jeugdige Duitsje toeriste de weeg vroogte nao Hoeve Droogenberg. Zuuste waal, zagte ze, die jeug van tegeswoordig is bès nog waal geïnteresseerd in monuminte van historie en architectuur. Wiste zee väöl dat die Prusje op zeuk waore nao Hoeve Drogenberg. Mèt ein 'o' in plaats van twie....

't Sjeint allemaal de sjuld te zeen van börregemeister Gerd Leers van Mestreech. Dè vint dat allemaal waal good, mèt die drugs, zoelang 't mèr wiet weg is. Wiet weg oet Mestreech, um precies te zeen. Leefs ürreges aan de grens, mèr bovenop de Bemelerberreg is auch good. Dao zeen ze waal gèt gewind es 't um bloowe geit, meint Leers. Dae is zeker al ins op 't Gastes nao de optoch kome kieke. Daobove trèk 't altied tot 't verrèk.

*Blowing in the wind*, um 't mèr ins op z'n Ingels te zègke.

De börregemeister van Mergraote vint dat mèr nik. Dae sjtuurde lèts geliek de ME d'rop aaf toen d'r ein melding binne kaom dat ze in Keer aan de Bemelerweeg mèt stickies aan de geng waore. Die blauwwe sjtoonte waal raar te kieke, dao op 't hockeyveld...

Nao 't sjeint weurt op de Zjwarte Weeg al zoeväöl hasj gerouk, dat ze bee de gemeinte van plan zeen de naam te verandere in Blauwe Weeg. Blauw van de rouk. Este dao langs veurs,

zaet auch eederein ‘haai’ in plaats van ‘hoi’. En este dao ‘haasje...!!’ huurs, wètste noets ofste ‘gezoondheid’moos zègke of ‘nei, dank uuch, iech rouk neet’...

Gerd Hardleers trèk ziech van de proteste van de gemeente Mergraote wienig aan. Heer bleif gewoen alle drugstoeriste de sjtad oetjage, ’t platteland op. Ze maoge pas weer trùgk kome es ze de piep lèèg hùbbe. En de innigste die in Mestreech nog maoge sjpuite, zeen die van de brandweer.

De gemeente Mergraote hèèt al besjloote dat ze oet vraak de cd zulle boycotte die Leers hèèt opgenome same mèt die die neet oet Lottum kome mèr ùrreges andersj vandaan. ‘n Plaats in de top-2000 van volgend jaor kin heer dus waal vergete. Dat zal ‘m liere!!

Wie dit verhaol aaflùp?

Dat huurt geer mesjiens volgend jaor. De Geruchtemeule maalt weijjer.... Gedraag uuch! Of leever neet, eigelik...

## De "Maria-grot"-tour van reisburo "Brandend zand"



# Ondersjeijing van de **kopere kromme veur:**

De Kopere Kromme, oos hoegste carnavalsoondersjeijing van Bemele, de Kopere Kromme, is dit jaor towgekènd aan:



**Wiel Dreessen** (dao is 'r weer...), umdat heer vanwege zien veertigjaorige karjère in de polletiek de gouwe ierepenning van de gemeinte Mergraote haet gekrege....


**Jean Andriën en Pierre Koekelkoren**, umdat ze ein gans minsjeleve (65 jaor) lid zeen gebleve van de hermenie....

**Pierre Pittie**, umdat heer neve al zien verplichtinge (wèrreke, nao de kaffee goon) toch nog tied haet gevoonde um veertig jaor mèt de hermenie mèt te trèkke (en umdat heer zelf nog Manuela Bessems, Wendy Bessems, René Brouwers, Paul Oberjé, Kitty Rouwet en Ronald Severijns, umdat zee same 90 jaor (6 kier 15) lid zeen van Sint Laureens....

Oud-pesjtoer **Jacques Maas**, umdat heer z'n veertigjaorig priesterjubilee vierde (en Bemele häöm nog neet vergete is...)

**Henk en Diny Urlings**, umdat ze vanoet Amby hun diamante trouwfees toch mèr weer in Bemele kaome viere. Ze kinne 't toch neet laote...

# Jeugdpreensesse Roos en Rowie



...en wie leuk veer 't gevoonde höbbe kint geer zeen op al dees foto's. Eederein dè dat meugelik hét gemaak, bedankt !! en unne fijne vastelaovend geweens, Alaaf !! Roos en Rowie.



# CARe

S C H A D E S E R V I C E  
voorheen Autoschade De Bruyn

## CARe Schadeservice B.V. Vestiging Maastricht

Fregathweg 80, 6222 NZ Maastricht  
Telefoon (043) 362 07 77, Telefax (043) 363 59 19  
E-mail: Maastricht@CARe-Schadeservice.nl  
Website: www.CARe-Schadeservice.nl

## Sponsors



### Maurice Ubaghs Exterieure Facilitaire Diensten

Kerkstraat 6  
6267 ED  
Cadier en Keer  
Tel. 043 - 4070160  
Fax. 043 - 4070161



W. DRIESSEN

SNACKPOINT®

De snackbar voor  
uitgekiende kwaliteit

EINSTEINSTRAAT 16B  
6227 BX HEER - MAASTRICHT  
TEL.: 043 - 361 81 66



BEMELEN PRESENTEERT  
IN SAMENWERKING MET  
RUITERVEREINIGING VRIJ EN BLIJ



# JUMPING OUTDOOR BEMELEN

MET SPECIAAL NUMMER  
CONCOURS HIPIQUE MET KAR

